



16. Maj 2019

UPA 2019/176
Aqqalu C. Jerimiassen

Qaanaami kulturimik toqqammaveqartumik immikkuullarissumllu piniariaatsit kinguaariinnut aggersunut iluaqtissatut qanoq ililluta tammatsaalineqarnissaannik qulakkeerinnissinaanerput pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Mikivsus Thomassen, Inuit Ataqtigiit)

Naggeqatigiit Inuit tassaavugut nunarsuatta avannaarpiarsuani inuuffigiuminaaqisumi amerlanngitsunnguulluta najugaqartuusugut, nunarsuarmioqataaleriartornittalumi malitsigisaanik inooriaatsitta allangoriartorerata ullut tamaasa malunnarluni, ippassarmi pisut ullumikkut qaangiutereersimasarmata.

Naak annertuutigit aalisarnermut kalaaleq ikaarsaangaatsiareernikuungaluartoq sulii piniarneq ulluinnarni pingaaruteqarluinnarluni inissisimavoq.

Tamannalu pillugu Atassummiit Inuit Ataqtigiinni oqallissaarummik suliaqartoq immikkut quttavigiumavarput qulequtaq soqutiginarluinnartoq qaqqimmagu.

Pinialunneq nammineq umiatsiaqaraanni umiatsiaqanngikkaluaraanniluunniit arlalippassuugunarpugut pinngitsoorsinnaanngilluinnagarisatut atungarigipput, inuullumi peqqissuunissaanuttaaq imaani pinngortitamilu angalaneq tassaavoq anersaakkut nukittorsaatit tamani annersaat.

Nunarput angeqaaq unammillernaqaaq, akisussaaffigitigu suleqatigiilluta, isorartunerujussuatalumi pilersippaa inooriaatsigut assigiinngilluinnartuusut, tassami nammineq oqallissaarusiortup uangalumi aggerfipput tassaavoq Avannaata Kommunia. Tamannali isumaqanngilaq inooriaatsigut qanittukasiusimasut, tassami Avannaata Kommuniiani illoqarfimmik avannarlerpaameersoq uanga kujallerpaameerama, Ilulissat Qaanaarluni imminnut assersuukkuminaaqaat. Piniariaaseq immikkuullarissuq ingerlataat tassaavoq nunatta avammut kulturikkut sulii peqarneranut takussutissaalluinnartut ilaat puigorneqanngisaannartariaqartoq.

Pisassiisarnermi eqqarsaatigineqarsinnaasut ilagisaat tassa, soq akitsinni taamannaanaq atorluaataqaratillu qilalugarpassuarnik pisaqartartut kalaaleq atorluaanermut pittaanitaannguartartorluunnit (ilaatigit) soq taama killeqarnerutiginersoq. Naak piniariaasitoq malillugu immikkut pisassat kisitsisilernerqartaraluartut soqutiginarluinnartoq eqqartussallugu taamannak piniariaatsimik ingerlataqartut ilumut pisassanut immikkoortitsissunneqartuarnissaat. Takorluugaasinnaavormi tamanna immikkut kulturikkut illersukkatut inissinneqarsinnaasuuppat pisassat allaanipilussuarmik inissinneqarsinnaangaluartut, umiatsiaararsortullu angallammilluunniit piniarnerit kisiisa immikkut pisassiissutinut kisitsiseqalersillugit.